

Ti'ikitame

Ti'ikitame

¹ 'Iki kanihikitini ti'ikitame niukieya, Rawiri nu'aya, Kerutsareme miti'aitametikai.

² Mipai kanaineni ti'ikitame:

—Tita tixaiti temite'erie,
tixaiti pikatihiki,
naiti tixaiti pikatihiki.

³ Ketita ra'iwa tewi,
waikawa tiyurieneti 'iki tukaritsie timieme?

⁴ Hipati mepitakukuwe, hipatita mepitinunuiwa,
matsi kwie yaxeikia kani'aneni.

⁵ Tau panatineika meta pakayuyuipe,
miki yumexiitai yuhuyeripa
tawarita yu'itima manatineniki.

⁶ Tatsutia kaniu'ekani,
tatsierieta hekututuketi,
tawarita hekwameki muku'ekaki yu'utima
katihayewati kaniu'ekani.

⁷ 'Aki 'amipapa haa muhapane haramaratsie
peukayuyuipe,
peru hatsuaku haramara pikatahine.
Tawarita yu'utima kani'atiwani,
miki muhapaneniki 'axeikia.

⁸ Waikawa pikwaniwe nemititaxataki
matsi waikawa kemitiyiwe mitiutaxataki.
Naka matsi waikawa mipai katineu'enamikini,
Meta hixite pika'uxiwe mitaniereniki.

⁹ Meripaiti kemitiuyi
mipaita katiniiyimiki:

ketita meripaiti mitiutiwewiya
 naitiri katinihekiaka,
 tawari tihekwati pitiumawe 'ena muyuawitia.

¹⁰ Xewiti piyiwe mipai mutayini:

«Neuxei 'iki kanihekwanike».

Matsi meripaiti katinixuawekaitini yuheyemeki,
 tame 'akuxi tekatinunuiwawawekaku.

¹¹ Tame hiki hipame tepikawara'eriwa
 kememite'uyuri,
 ta'utimata memitinunuiwa 'at-
 simepikatehetimani ketemiteyurie hiki.

Matiari mieme 'ikitariaka

¹² Ne, Ti'ikitame, Kerutsareme
 nepiti'aitametikai 'Ixaheritsixi watsata.

¹³ Nepinewairi yanemiretimaniki kemiti'aneki
 'ena kwiepa, mipai nepiretima Kakaiyari 'uximay-
 atsika pitatsi'uku'eiriri waikawa haheteme tame
 yatemitekakineki hetsiena.

¹⁴ Naime mipai nepiretima ketemiteyurie 'ena
 kwiepa, pikatiyupata 'eka muweiyani hepai
 kani'aneni.

¹⁵ Titunime mutaxeurariya pikayiwe,
 meta pikayiwe miti'iniataki kepaimeti
 meuyewetse.

¹⁶ Merikite nepineti'iyaritia: «Waikawa
 nepeukawe meta nepitimaiwe keyuri meripaiti
 te'aitamete Kerutsaremetsie, ne naimeki
 nepiyiwe nemititiwauniki netimaiweti
 waikawameki meta neheitimaitiyeikati.

¹⁷ Ne yemeki nepineyetua netimaiweti
 nemayaniki, nekanimaikata mikayikihiawe meta
 mika'uka'iyari, matsi miki 'eka manuku'axe hepai
 kani'aneni.

¹⁸ Matsi puyuri,

»kepauka waikawa memitemaiwawe matsi
waikawa kanixuaweni 'uximatiarika,
kepauka waikawa memitemate waikawa
mepite'ukakukuine».

2

¹ Merikite mipai nekatiniunehiawe: «Kamitsi nekatinita'iniatamiki naime nemuyutemawieritianiki 'aixia muti'aneke matsi waikawa tukari neminepitianiki». Peru tsepa mipai nemitiuyuri tixaiti nepikatiukaxei.

² Mipai nepiretima yutemawierikaki purukuyaneni xeikia, kemimatinake pe'uyeikati miki tixaiti pikatihikita.

³ Mipaita nekatiniuyihiawe yanemiretimaniki winu nekananu'ieni, mexi mipai nereti-maiximekai, nepineyetua nemika'uka'iyarini hepai, yanemiretimaniki tita 'aixia muti'ane tewi tikaxeiya kemitiyurieneki 'ena 'uyeikati 'ena kwiepa mexi'ayeniere.

⁴ Waikawa mamariwaweme nekatiniuti-wewieni: kii nepunetiwwiri, meta kaxie haraweriyari nepexeiyakai,

⁵ nehetsie timieme nekatini'uximayakaitini, harawerita meta 'iteirite, mana nekatiniuka'iteirita kiyexite yu'ikwaxi mexeiyatika.

⁶ Yaxeikia putsu 'emeukatetewa nekaniuti-wewieni waikawa kiyexi mana muxuawekai nemihatuiyaniki mitiwawereniki.

⁷ Te'uximayatamete waikawa
nepiwarexeiyakai 'ukitsi 'ukari, meta

waikawa wakaitsixi, meta muxatsi meripaiti kiekatari te'aitamete Kerutsareme kememikateheuxeiyakai.

⁸ Huru, pɪrata, piinite miraye'axe nepɪtiukuxeiri te'aitamete tiwapiinite meta kiekarite. Nepiwarexeiyakaita kwikamete 'ukitsi meta 'ukari, waikawa nepinetemawiekai teiteri wahamatia, nerexeiyati titaki tewi mɪtiyutatua mirexeiyaniki.

⁹ Nematsi nemariweti nekanayani, keyuri hipati meripaiti te'aitamete Kerutsareme miemete, metatsiere yaxeikia nepɪtimaiwekai.

¹⁰ Naime mipai nepɪtiuyuri kenemɪtiyurimikikai nekimana, naime mipai nepɪtiuyuri kemɪnetinakekai, nepinekatemawi mipai netiuyurieka naime ne'uximayatsikaki. 'Ikiki xeikia waikawa ne'uximayatsika patia.

¹¹ Nepuyuti'iyaritia naimeki ne'uximayatsikatsie kenemɪtiuyuriekaiki, waikawa nemɪtineti'uxitiaki neti'uximayati, mipai nepɪretima miki tixaiti pikatihikikiai, xika 'eka pe'anukuweiya pepikahenuku'axe, mipaita katinimatsiikini tixaiti pikatihiki 'atukaritsie timieme.

Tixaiti kwiepa timieme tepikatehanutini

¹² Merikitsi nepeuyuti'eriexia kenemɪtimaiwekaiki, meta mikayukihaweki meta mika'uka'iyariki —Ɂketiyiwe tawari ne'utima ti'aitame manukakeni yamɪtiyurieniki, nehapai pɪtiyurieni xeikia?—,

¹³ mipai nepiretima matsi waikawa peuyewetse mitimaiweniki keyuri mika'uka'iyarini, hekiariya 'aixia mi'ane hepai keyuri yiriya.

¹⁴ Kemi'ane mitimaiwe taneniereti kaniumieni, peru kemi'ane 'atsimikatimate yiwipa kani-uyeikani.

Peru tawari mipai nepiretima teyunaiti yax-eikia katatinitakwewieka temikwiniki.

¹⁵ Merikite mipai nepitiunehiawixi: «Kamitsi mika'uka'iyari hepai nepitimi, merikite titaki tiyunaki'erie kenemitimaiwe?» Mipai nepitiunehiawixi miki tixaiti pikatihikitikai,

¹⁶ Mitimaiwe meta mikatimaiwe tima pikahaye'eriwa, 'ureumieti yaxekia mepitehatimaiyarieni, metatsiere yaxekia mepitekwin memitemaiwawe meta memikatemaiwawe.

¹⁷ Meriki netukari nepiti'uxiwe'eri, tsepa naimeki mipai nemitiyurienekai 'axapi'ane kai nekimana. Yuriki naiti tixaiti pikaratia, matsi 'eka 'utima pemunautsarimeni hepai kani'aneni.

¹⁸ Yaxeikiata nepiti'uxiwe'eri kenemitiuyuri waikawa neti'uximayati 'ena ne'uyeikati, nemiku'eiririeniki xeikia ne'utima manukakeni ti'aitati,

¹⁹ 'Atsipikatimatsiki xika miki timaiwemiki yati pikatimaiweni. Matsi katiniyukapinitiamiki waikawa neyu'iyaritiati meta netimaiweti kenemitiuyuri 'ena ne'uyeikati. Miki meta tixaiti pikaratia.

²⁰ Waikawa neyu'iyaritiati matsi 'ipai nepitinehiawixi, netixeyati waikawa kenemitiuyurikaiki 'ena kwiepa,

21 matsi hipati kememitemaiwaweki,
kememite'uyemateki mekateni'uximayatakuni,
miki xeime memiyetuirieniki
mikatiuta'uximayataxi hatsuaku hetsiemieme
naimeki kememite'uyuri. Peru mikita tixaiti
pikatihiki meta 'axapi'ane,

22 Kamitsi, Ɂtita ra'iwanikuyu tewi xika
yutirikariyaki yianeni kemitiku'eriwa, waikawa
yu'iyaritiati tixaiti pikara'iwa 'ena muyuawitia?

23 Naime tukaritsie 'axakani'itiarieka
tiuka'eniwati meta tsikere tikariki
pika'uka'uxipiwe tiku'eriwati. Mikita yaxeikia
tixai pikatihiki.

24 Matsi tewitsie pitiumawe 'aixia ti'aneti
'ikwaiki xeikia 'iiyaki pi'ayumie yutemawieti
yu'uximayatsikatsie. Mipai nepiretima mikita
Kakaiyari hetsia kanayeneikani,

25 kamitsi Ɂkemi'ane piyiwe mitikwaniki
meta muyutemawiekaki xika Kakaiyari hetsia
katimiemetini?

26 Kakaiyari matsi mitimaiweniki meta
meitimaitiyeikaniki meta muyutemawiekaki
kaniyetuirieka kemi'ane miki minake miye-
tuirieniki, matsi 'axamitiyuriene kanihayewani
para miki mitixeirieniki miyetuirienikita
kemi'anetsiere minaki'erie. Peru mikita
'axakani'aneni 'eka muweiyani hepai.

3

Tukari puxuawe kemitiuyurieni hepaitisa

1 Xexuime tukaritsie pitika'iniaaritika, tukari
puxuawe naimetsie timieme kemitiuyurieni
muyuawi hetia:

² Kepauka temitinunuiwa,
 kepaukata temikwini,
 kepauka mitiuka'iteirita,
 kepaukata temiteka'uta,
³ kepauka mitiuyumieni,
 kepaukata muwaranayexiriwani,
 kepauka mitiuka'unaki,
 kepaukata menukuketianiki,
⁴ kepauka mutatsuakaniki,
 kepaukata mutanaweniki,
 kepauka muyuhiwerieka,
 kepaukata temawierika mexeiyani,
⁵ kepauka tetexi mutaxirieni,
 kepaukata mititiki,
 kepauka muyutapatikani,
 kepaukata muyutateutiaxiani,
⁶ kepauka mitikuwauneni,
 kepaukata mikatikuwauneni,
 kepauka mutiuti'uta,
 kepaukata mirexirieni,
⁷ kepauka mutiutatsana,
 kepaukata mitiutawipa,
 kepauka mika'utaniukani,
 kepaukata mitikuxatani,
⁸ kepauka muyunaki'erietikani,
 kepaukata mitiyuka'uxiwe'erieka,
 kepauka mukuyaxatini,
 kepaukata kayuwati memexeiyani.

Tixaiti pikarayani tsepa waikawa
temite'uximaya

⁹ Tixaiti pikara'iwa kemi'ane waikawa
 tiyu'uxitiatu miti'uximaya.

10 Mipai nepitiniere Kakaiyari mipai pitwarupitia hahetemeki, tewi mipai muti'uximayakaki.

11 Kakaiyari witsiti'aneme katiniunetiani, mipai tewi katiniupitiani mipai mitiku'eriwaniki 'uxa'atiniwarie, tsepa tewi mikaheitimaitiyeika Kakaiyari 'uximayatsikaya miki kemitiyuriene matiari paiti meta 'imatirieka.

12 Ne nepitimate tewitsie puxuawe xeikia, temawierika meta 'aixia mitiyurieneki mexi'ayeyuri.

13 Mipaia nepitimate kename Kakaiyari 'imikierieya hiki, tewi mitikwakaki miti'iekaki, meta naime yu'uximayatsikatsie timieme mira'ininiatani.

14 Yaxeikiata mipai nepitimate naime Kakaiyari mitiunetia yuheyemeki katiniwiyani, pikayiwe temitanitiani meta temenakaxirieniki, Kakaiyari mipai katiniuyurieni temimakaxeniki.

15 Hiki tita mitixuawe, katinixuawekaitiniri, ketitamitinenikekai, 'ariri katinixuaweni. Kakaiyari mipai katiniyurieneni 'ixatsieya yamireuyuhaneniki.

'Axaketemiteyurie tatukaritsie

16 Matsi tawari tixaiti nekatinixeiyanita 'iki tukaritsie: 'axakatiniyianeni hakewa meta'iwawiyarienitsie, hakewa miheitserie mekuxaxatsiwatsie 'axamiti'ane kanixuaweni.

17 Meriki mipaia nepitiu'eri: «Kakaiyari heitserie mexeiya meta 'axamitiuka'iyari kaniwaranutaxiriemiki, muxuaweki tukarite yamitiuyurieniki naimeki meta hakewa yamireyurieniki».

18 Meta mipai nepitiu'eri teiteri
kememiteyumate wahepaitsita:
«Kakaiyari kaniwa'iniataneni, miki mipai
memiteheyutimaniki kename yeuta
memite'u'uwa wahepai me'anene.

19 Teiteri yeutari wahepai mekateni-
takukuweni, yaxeikia mekatenita'ikwewani
metakukuweti yuxexuiti, yaxeikia meta
kani'aneneni yunaiti kememite'ayeyuyuri, 'ayu-
mieme tewi pikawe'eme tewaxi wahetsiemieme.
Yuriki naiti tixaiti pikarayani,

20 'Axeikia naiti katiniyemieni.
»Naiti tumuanaritsie mitiyetia,
tumuanaritsie katininuamiki.

21 »¿Kemi'ane pitimate xika tewi 'iyarieya 'anu-
tiyeikani 'ameutitewatsie, meta yeutari wa'iyari
xika 'anukayeikani, 'emeukatewatsie kwiepa?»

22 Mipai nepiretima, tewi hetsie puxuawe
xeikia, yu'uximayatsikatsie mitiwiyaniki miki
hetsiena pitunakixi. Kamitsi, xewiti pumawe
xeime mipai mititahiaweki kemitiyini.

4

Memiyuhiwerie memiyutemamawie

1 Merikite neniune'iwiyata 'iki tukaritsie
waikawa kememite'uka'eniwakai. Nekaniwarux-
eiya 'axamemute'anuyehu me'utitsuaname,
xewiti pumawekai miwanitiani, tirikariya
memexeiya mekaniwa'uximatiakaitini,
pumawekai kemi'ane muwanitiani.

2 Mipai nepitiunehiawixi. Matsi waikawa
mepuyutemamawie kemi'ane memukwiri,
keyuri memayeneniere,

3 matsi mekaniyutemamawieka
kemi'ane memikatinunuiwawe 'akuxi,
'atsimemikatemateki ketita 'axamiti'ane 'ena
kwiepa.

4 Meta nekaniuniere 'aixia 'aneme
yu'uximayatsikaki yutukaritsie mekaniwaranu-
tanieritiwani 'axamemitewakihawe. Mikita
yaxeikia tixaiti pikarayani, 'eka pemuweiyani
hepai kani'aneni.

5 'Atsimikatitude yutapa kanawieka,
ya'aneti haakaki kwikaniyaneni.

6 Matsi 'aixia pi'ane kayuwati miti'uximayaka 'et-
siwa mirexeiyaniki,
keyuri waikawa tikumaiwati waikawa
mirexeiyaniki
xika waikawa tikumaiwani tixaiti
pikarayeika,
'eka muweiyani hepai xeikia pi'ane.

Teyuxewiti matsi tekanitirikaïyeni

7 Xaitsie tawari tixaiti mikatihikitsie
nekanine'iwiya 'ena kwiepa:

8 tewi xeime nekaniuxeiya yuxaitame
'uyeikame, tiiri kawarexeiyame meta
yu'iwama, peru pikatihayewakai waikawameki
yu'iyaritiati yu'uximayatsikaki, hatsuaku mipai
pikatiuyuhawixi waikawa kemirexeiyakaiki
«¿Kamitsi kemi'ane rahetsiemieme ne waikawa
nepiti'uximaya, 'aixia nemitiyurieneniki
nekayuwairiyati?» mipai katiniuyuhawe. Mikita
tixaiti pikatihiki kenemitiune'uxitia waikawa.

9 'Aixia matsi kani'aneni yuhutati keyuri yuxewiti,
miki matsi waikawa mekanitatseirikuni ke-
memiteyu'uxitia.

10 Xika xewiti 'atiweni, xewiti kanenukuhanimiki.
Matsi xia'ui kemi'ane matiweni,
mikaheixeiya kemi'ane menukuhana.

11 Yuhutati xika me'uheni,
mekaniyuxiriyani,
matsi yuxaita ¿kehepai tiyutaxiriya?

12 Yuxaitame kana'iwariemiki,
matsi yuhutati mekaniyuparewieka.

Kaunari xika haikani
yapauka pika'anutekieni.

Pemitemaiki ketinemaiweni

13 'Aixia matsi kani'aneni temaiki tixaiti karex-
eiyati peru xika timaiweni,
keyuri ti'aitame meripai mieme
'atsimikatitude,
kayi'ixatsitiariniati.

14 Tsepaneti 'anutahiiyame wayeyame 'uwenit-
sie maya, yatini tixaiti karexeiyati 'utinuiwame
ti'aitame mayaniki,

15 ne mipai nepitimate matsi 'iki temaiki
waikawa teiteri mekaniparewieka, manukak-
eniki ti'aitametiti.

16 Peru tsepaneti teiteri memikayu'iniatsinia
te'aitamete memiwaruweiya, yumiiretita
'arike memi'axe, mekayutemamawieti
mekaniyuhayewani hetsienamieme. Mikita
yaxeikia tixaiti pikatihiki, 'eka manuku'axe hepai
pi'ane.

5

Ketinaye'atiwani kepemitayini

1 Kepauka Kakaiyari kiita pemeutahani,
pe'a'iwiyati kepemitiuyeikaki kene'enieka keyuri

pe'iyetuirienike mawari 'atsimemikatemate wa-hepai, miki 'axameteyuriekame mepikayu'erie.

² Pepika'amexiitiaka,

'ateniki meta kepemitiku'eriwaki,

pe'ahiritiati Kakaiyari hixie xeiniukiyariki,

miki muyuawitsie kanakakani 'ekita kwiepa peka-niuyeikani.

'Ayumieme 'aniuki kenexewiriyani.

³ Kemi'ane waikawa muyu'iyaritia ka-tiniuka'eniwani 'axati'aneme tiheiniti,
kemi'aneta waikawa mutaniuka yaki xeikia katinikuxatani.

⁴ Kepauka Kakaiyari hetsia tixaitiki
pemitihiritia, 'apepikareutewini
yapemitikayaniki, Kakaiyari matsi
pikayutemawie yamemikatekahu wahet-siemieme. Kenaye'atia kepemutayiki:

⁵ Matsi 'aixia kani'aneni xika tixaitiki
katiyuhiritiaka,
mipai tiuyurieme kapa kaheye'atianiki.

⁶ 'Ateni pepikapitiaka kapa 'axapetiuyurieniki,
yapepikahaineni Kakaiyari tupirieya hixie, ke-name yapekara'eriwameki petiuyuri. ¿Titayari matsi Kakaiyari petihaxiatia miyape'utaiti naime mitika'unaki 'a'uximayatsika?

⁷ Matsi waikawa xikaxuaweni tixaiti mikatihiki,
heiniti 'axa'aneneti tiyu'uximatiwati, yakixeikia waikawa mayeniuweniki, 'eki matsi Kakaiyari kenayemakaxeni.

Tsepa pemixiku tixaiti pikatihiki

⁸ Xika xeime kwieyaritsie pewaruxeiya mewananaimakame tixaiti memikatehexeiya,

meta teiteri mekawapitiati heitserie memex-eiyaniki, mikiki pepikahixiyaka, kemi'ane waikawa muwe'eme xewiti matsi waikawa we'emetiti kanixeiyani, meta waheima matsi xewiti mariweti kaniwaxeiyani.

⁹ Kamitsi 'iki naimeki tixaiti pikatixuawe 'aixia miti'ane 'iki kwieyaritsie, miraka'etsitiretsieri miti'wiyani peuyewetse ti'aitame.

¹⁰ Tumini kemi'ane minakie'erie, pikatahiniwe tuminiki. Kemi'ane waikawa mirexeiyaniki miyiane matsi waikawa pireuyehiwa. Mikita yaxeikia tixaiti pikatihiki.

¹¹ Hakewa waikawa mirexuawe, kananuyuhayewanita mitixitianiki, ʒketita 'aixia miti'ane kamitsi tiutixuaweriyaxi kutsiyarieya 'ixeiya xekia?

¹² Ti'uximayatame 'aixia 'anemeki kaniukakukutsuni, heiwa waikawa tiutikwa'ati heiwa 'etsiwa xekia. Mixikuta waikawa mirexeiyaki piiniteya pika'ipitia 'aixia 'iyari mikutsuniki.

¹³ Hiki tukaritsie nepitixeiya waikawa 'axamiti'ane: waikawa tumini muti'utaki xekia kemi'ane miti'utaxi mu'uximatiarieniki,

¹⁴ meta miki piinitiarika preuyewautse hau'erieti xika petita'uximayatsitiani. Miki kutsiyarieya xika heiwa yuniwe hexeiya 'ayani tixaitiri pikarexeiyani miku'eiririeniki.

¹⁵ Ke'aneti mutinuiwaxi yumaamatsie, mipaita 'aneti kaniyemieni: maweti kemitinua 'ena kwiepa, tixaiti pikaranutini waikawa yu'uximayatsikatsie timieme.

¹⁶ Miki matsi mari'itiarika kanihikitini: ke'aneti minua tewi mipai 'anetita kaniyemieni. ʒKetitayari

kamitsi waikawa rexeiyani tixaiti karayanikayu?

¹⁷ Imatirieka kepaimexia muyeikani yiwipa katinikwakamiki, meta waikawa 'uximatarieti katinikuyekamiki 'ayu'eriyati.

¹⁸ 'Iki kanihikitini kenemiretima: 'iki tukaritsie 'aixia kani'aneni matsi mitiutikwa'ani miranuye'eni, ketipaimeme pemirexeiyaki pe'atemawieti matsi ketinekwaka. Miki kanihikitini Kakaiyari mitatsiyetui, miki tahetsie mitiunakixi pihiki.

¹⁹ Matsi Kakaiyari kemi'ane mitiyetuirie waikawa mirexeiyaniki, kaniyetuiriekata yu'uximayatsikatsie timieme mitikwakakita, miki kanihikitini Kakaiyari kemitatimikwa teyuxexuime.

²⁰ Kakaiyari wa'iyaritsie kemitiwahiniya temawierikaki, tewi yutukari 'etsiwa xeikia kaniku'eriwani.

6

Ketitari rexeiya tatukari

¹ Xeimeta nekanixeiyani 'axati'aneme 'iki tukaritsie teiteri watsata:

² Kakaiyari hipame kaniwapitiaka waikawa memitehexeiyaniki meta 'aixia memitexeiyariekaki, meta tixaiti mepikateheuyehiwa tita memiteheiwie'erie, matsi hipameta pita piwapitia memitetikwaniki miki naime. 'Ikita tixaiti pikatihiki 'axamiti'ane.

³ Tewi xika warexeiyani xeitsienituyari yuniwema, meta miixa wiyari 'uyeikati, tsepa kepaimexia muyeikani xika kayukatemawiwani 'aixia miti'aneki, meta xewiti ka'ikateuku, matsi

'aixia kani'aneni nunutsi mitinuiwa mukiti keyuri miki.

⁴ Kamitsi miki nunutsi tixaiti pikaratia, yiriyatsata petia, yiwipa puyuhayewa kemititewakai.

⁵ Hatsuaku tau pikaxeiya meta tixaiti pikaretimani, matsi miki kayuwati hexeiyati kanayeimiki keyuri miki tewi,

⁶ tsepa huta miriyari wiyari 'amuyeikani, 'aixia miti'ane yakatiyurieneti. Matsi teyunaiti 'axeikia tekanekikani.

⁷ Tewi waikawa katini'uximayaka mitikwakaki, matsi hatsuaku pikatahuxani kimana.

⁸ ¿Mitimaiwe waikawa matsi kerexeiya keyuri mikatimaiwe? ¿Ketitari ra'iwakeyu tixaiti mikarexeiya, yutukari hetsiemieme miyiweniki?

⁹ Matsi tita mitiyuhekia 'aixia kani'aneni keyuri tikuwauneti. Mikita tixaiti pikatihiki, 'eka muweiyani hepai kani'aneni.

¹⁰ Ketita hiki mitixuawe 'ari kaneixeyakaitiniri kemititewa,
yakatinimatsiikini tita mitihiki: tewititi.

Xewiti muyutamieni pikayiwe
xeime waikawa mitirikaiye hamatia.

¹¹ Niuki waikawa mekananutiyayatsani,
matsi tixaiti pikatihiki.

¿Peru tita tete'a'iwa kimana?

¹² 'Atsitepikatemate, ketita matsi 'aixia miti'ane tahetsiemieme. Tixaiti pikatihiki yapaimexia xeikia mayeyurini 'etiri hepai xeikia yapauka makumawere. ¿Kemi'ane piyiwe yamititahiaweki tukarieya hepaitisita, kemitiyini 'arike miyuke?

7

Hekwameki kepemitiuyeikani

¹ Matsi tewi 'aixia peketixeyarieka,
keyuri witsipe'u'iatì.

Matsi katiniiyunaki'erieka kepauka temikwinitsie,
keyuri temitinunuiwatsie.

² 'Aixia matsi kani'aneni miki makateukienitsie
pemunie,
keyuri 'ixiararipa.

Temikwiniki teyunaimeteiteri tahetsie
kanimiemetini, memayeneniereta matsi mipai
meketemaika.

³ Miyuhiwerieka kaneuyeweka keyuri
mutanaweni,
kananakanutuixieka yuhixie,
matsi 'aixia kaniyurieka 'iyarieya.

⁴ Mitimaiwe kaniku'eriwani kepauka mimini,
matsi 'atsimikatimate kaniyu'iyaritiaka
xeikia kemitiyurieneke.

⁵ Matsi 'aixia kani'aneni mitimaiwe
miratate'aniki,
keyuri 'atsimikatimate niukieya tsi'aneneme
'enieti.

⁶ Tixaiti pikatihiki 'atsimikatimate kemitikuxata,
mipai xeikia katinimatsiikini, xuya xarita
matikateni hepai. Mikita tixaiti pikatihiki.

⁷ Mitimaiwe nanaimarikaki katimaiweti
kanayeimiki,
tuminiki yu'iyari kanikwiemaka.

⁸ Matsi 'aixia kani'aneni tixaiti mireutipareki,
keyuri titsutarieti.

Matsi 'aixia kani'aneni mitiuka'eniwaniki
waikawa
keyuri yu'ariwieti.

⁹ Haxiaki xeikia pepika'ayeweni,
 matsi miki 'atsimikatimate kani'iyarieyatini.
¹⁰ Mipai pepikahaineni kename meripaiti
 'aixia metiyuriekai. Miki kememutiyuane
 memitemaiwawe wahetsia pikamieme.

¹¹ 'Aixia kani'aneni pemitimaiweniki tita 'aixia
 miti'ane hepaitisita, hiki memu'uwa wahetsie
 'aixia miti'aneniki.

¹² Pekaniyiweni mitimaiweniki 'etiriyayatsie
 pemuyeikaniki metatsiere tumini 'etiriyayaritsie,
 matsi mitimaiweniki mi'ayumieme tukari
 kaniwapitiamiki kemi'ane memeixeiyani.

¹³ Kakaiyari 'uximayatsikaya keneuxeiya:
 ¿kemi'ane piyiwe mitixeurariyaki tita miki
 mutiutitunaxi?

¹⁴ Kepauka 'aixia ti'aneme pemirexeiyani,
 kene'atemawieka, matsi kepauka 'axati'aneme
 pemirexeiya, keneutimaixia 'uximayatsika
 naiti Kakaiyari hetsia kanayeneikani, tewi
 'atsimikatimateki ketita mitikaxeiya 'arike.

¹⁵ Hiki tukaritsie nemuyeikakai tinaima
 nepitiuxei: teiteri 'aixia memite'u'uwa 'aixia
 miti'ane kaniwaka'unani, teiteri 'axamemiteyurie
 'axamiti'ane 'apitiwareuteritia.

¹⁶ Kwinimieme 'aixia mitiyuriene pepika'a'erieka,
 meta kwinimieme mitimaiwe
 pepika'ayuyeitiwani.
 ¿Matsi ketitayari peti'aka'unamiki
 'akimana?

¹⁷ 'Axapetiyurieneti pepika'ayuyeitiwani,
 meta 'atsimikatimate hepai.
 ¿Ketitayari petimini

kwitiwa?

18 'Aixia kani'aneni 'iki peha'eriwati,
peka'itatuayati tita pemirexeiya.
Kakaiyari kemi'ane mayemakaxe,
miki naimetsie yakatinikamieni.

19 Mitimaiweniki mi'ayumieme matsi mitimaiwe
kanitirikariyani,
keyuri tamamata te'aitamete xeikiekariyarit-
sie.

20 Xewiti pumawe 'ena kwiepa 'aixia 'aneti,
'aixia tiyurieneti hatsuaku 'axakatiyuriweti.

21 Pepikawa'enieka yunaima kememutiyuane,
mipai matsi peyianeti mati'uximayatsiriwame
pepika'enieni kepauka 'ahepaitsita 'axamitayini,

22 'ekita pekatinimaika, heiwa miixa 'axapeka-
niutaineni hipame wahepaitsita.

Piinitiarika kenemitikuwaunekai

23 Naime 'iki 'aixia nekatiniuyurieni
netimaiweti, mipai nepitiku'eriwakai waikawa
netimateti nepaneyeitiani, peru mitimaiweniki
mi'ayumieme 'ateewa paiti kaniyuhayewakaitini
nehetsia.

24 'Ateewa yemeki 'aheukatewakaku
katiniyuhayewa naiti tita mitixuawe. ¿Kemi'ane
piyiwe meitimaniki?

25 Merikite nekaninuani nemititamarieniki
meta nemiretimaniki, mitimaiweniki
mi'ayumieme nemitixeiyaxianiki, meta
piinitiarika hetsiemieme, 'ana mipai nepiretima
'atsimikatimate hikiti 'axakatiniyurieneni meta
mika'uka'iyari kanirukuyaneni xeikia.

²⁶ Tixaiti matsi nekatiniukaxeiya kwimieme ratsiwime keyuri miminiki: 'uka mitiyu'itaiya kanihikitini, wipi winiyariyari kanexeiyani yu'iyaritsie meta yumamatetsie tepia kaunariyari kanexeiyani. Kemi'ane Kakaiyari mitemawieritia kaniyixinamiki miki hetsia, peru 'axamitiyuriene miki winiyarieyatsie kaniyukahiamiki.

²⁷ Ti'ikitameta mipai kaniutayini: «Neuxei 'iki nekatiniukaxeiya netiutiwauka piinite hepaitsita, xexuimetsie:

²⁸ 'akuxi nepitiwaune ketita nemikatikaxeyawe, matsi tewi xeime nekaniutaxeiya xeimiriari wahetsia mieme, peru yunaime 'ukari wahetsia xeimetima nepikataxeyawe.

²⁹ 'Iki xeikia nekatiniukaxeiya: Kakaiyari tewi kaniutawewieni 'aixia 'anekame, peru miki kanikuwauni yiki ti'aneneme».

8

¹ ¿Kemi'ane mitimaiwe hepai pi'ane? ¿Kemi'ane pimate kemitikuxata? Tewi mitimaiwe kanimatsiikini yuhixie meta kemitiyukanaki'erie kaniyutemawieka.

Ti'aitame kepemireu'enieka

² Ne mipai nepaine: Ti'aitame keneu'enieka, Kakaiyari yapemitiutahawixiki.

³ Pepika'amexiitiaka hixiena pemuwayeyaniki. Meta tita 'axamiti'ane pepikatiyexiatiaka miki mipai katiniyurieneni kemitinake.

⁴ Ti'aitame niukieya kani'enierieka, xewiti pikayiwe mita'iwawiyaki kemitiuyuri hepaitsita.

5 Kemi'ane yamitikamie miki kemiti'aitia pikatikwinitarieni tixaitiki. Yu'iyaritsie mitimaiwe katinimaika kehapai mitiyurieneni meta kepauka.

6 Kaniyuritini teyunaiti ketemiteyurie kanixiaweni kepauka, meta kehapai yamitiuyurieniki, tsepaneti tewi waikawa mitiuka'eniwa yuhepaitsita:

7 'atsikatimaiti kemitiyini hetsienamieme, xewi tima pikayiwe para mititaxatiani.

8 Xewiti matsi pumawe tirikariya hexeiyati yu'iyari mukunuitianiki, meta pumawe tirikariya hexeiyati miminiki hepaitsita. Xewitiri pikayiwe mirayukwinetsie meyuta'una meta 'axamiti'ane 'axatiyuruwame mutatuani.

Tukari metimaniki kanikwaniweni

9 Naimeki mipai nekatiniukaxeiya waikawa netimaimiti kenemitiutiwau nemiretimaniki naime kemiti'ane 'ena kwiepa: heiwa tewi xeime miti'aitiakaki kaniyiweni 'axamitiyurieneni.

10 Nekaniwaruxeiyata 'axateyuruwamete memukateukiexia —miki memeutahakekai mewayekikati hakewa Muyepatsietsie—, mikitsi mekanatimaiyarieni yukiekaritsie hakewa mipai memeyiakai. Mikita yaxeikia tixaiti pikatihiki.

11 Kepauka xeiya mikataxanetsieni xika 'axatiuyurieni, 'ana teiteri yu'iyaritsie 'axameteyurieti mekanakinikuni.

12 'Axatiyuruwame kaniyiweni xeitsienituyari paimexia 'axamitiuyurieni, meta miixa wiyari kaniuyeikamiki, matsi mipaita nekatiniimaika, 'aixia katiniwayuriekamiki kemi'ane Kakaiyari memayemakaxe mariweme me'ayeitiati.

13 Matsi 'axateyuruwamete 'aixia pikatiwayurieka meta miixa wiyari mepikayurieni. Miki 'etiri hepai xeikia mekani'anenekuni, Kakaiyari memikamakaxeki.

14 'Ena kwiepa waikawa katinixuaweni tixaiti katiyunaki'erieti, teiteri hipati mekanixuaweni 'aixia 'anemeki me'u'uwati, matsi 'axateyuruwamete wahepai mekani'itiarieka, meta mepuxuawe 'axateyuruwamete mikita yaxeikia 'aixia mekani'itiarieka 'aixia memitekahu wahepai. Neta mipai nekanaineni tixaiti pikarayani.

15 'Ayumieme, temawierika nekanexeiyani, tawari tixaiti pikatixuawe 'aixia miti'ane tewi hetsiemieme hiki tukaritsie, matsi mitikwakaki, miranuye'eniki xeikia, meta yutemawieti, mipai xeikia 'aixia kani'aneni xika waikawa yu'iyaritiati ti'uximayaka hiki tukaritsie, Kakaiyari 'ipitiakaku.

16 Naimeki yanemiretimaniki mitimaiweniki mi'ayumieme nemitixeyaki naime kemiti'ane 'ena kwiepa 'uyeikati, nepikakuwekai tukariki meta tikariki neyu'iyaritiati.

17 Naime nekatiniuxeiya tita Kakaiyari mitiutawewi. Tewi pikayiwe naime miretimaniki, Kakaiyari kemitiuyuri 'iki tukaritsie mieme, tsepaneti xewiti matsi waikawa muyutatua miretimaniki pika'itaxeiya, tsepaneti xewiti mitimaiwe mipai maine nenepimate, pikayiwe yamiretimaniki.

9

Teyunaiti kemitatikwewie

1 'Iki naimeki waikawa mipai neka-tiniyurienekaitini, 'ikiki meta naimenekatiniuta'iniata, 'aixia memiteyurie meta memitemaiwawe kememite'uximaya, miki Kakaiyari hetsia katinimiemetini, tewi 'atsipikatimate kemitiyukanaki'erieka meta kemitiyuka'uxiwe'erie, tsepa hixiena miti'ane.

2 Teyunaiti tekanikukuwemetetini:

heitseriekameki muyeika meta 'axa'anemiki muyeika,

'aixia mitiyuriene 'axamitiuka'iyari,

mi'itiya meta mika'itiya,

kemi'aneta mawari miwewie

meta kemi'ane mika'iwewie,

'aixia mitiuka'iyari 'axatiyuruwame,

kemi'ane tixaitiki mitiyuhiritia

meta xewiti mikatiyihiritia.

3 Xewiti xeikia kaniuyeikani 'axamitiyurieneniki 'iki tukaritsiemime: Teyunaiti tsieretsi tekanikwikuni. Metatsiere tewi 'iyarieya 'axamiti'aneki kanihineni, rukuxiya xeikia yu'iyaritsie kanexeiyani yuheyemeki, 'imatirieka xeikiari kanimimiki.

4 Kamitsi ¿kemi'ane rahetsia yapepira'eriwa? Yunaiti memayeneniere mekanita'ikwewani, matsi 'aixia kani'aneni tsiki mayeniereni keyuri maye mikiti.

5 Memayeneniere mipai mekatenumaika kename mekwini, peru mikite 'atsimepikatemate meta tixaiti mepikatetakwewie, miki yapauka mepatimaiyariwa.

6 Kememiteyukanaki'eriekai ke-
memite'uyuka'uxiwe'eriekai, meta ke-
memite'ukaheiwe'eriekai mana katiniu'axeni,
meta hatsuaku yamepikateyurieni ke-
memiteyurie 'iki tukaritsie mieme.

7 Ketinekwaka 'a'ikwaite pe'atemawieti,
kene'ieka 'awinu yemeki pe'awairiyati, 'ariri
Kakaiyari kaninaki'aka kepemiti'uximayaki,

8 Tsieretsi 'akemarite ketuxani meta hatsuaku
pikaheuyeweka 'akipatsiesie witsimu'ia.

9 Kene'atemawieka 'uka penaki'erietu tukariki
kepemiuretere kepaimekia Kakaiyari metsipitia
'ena kwiepa. Xexuime tukaritsie yakixeia
kepemituyurienne. Miki kanihikitini 'ahetsie
mitiunakixi kepeti'atatuati pemituikaxei 'ena
kwiepa.

10 Naiti 'ahetsie miti'axe 'aixia 'anemeki
yaketineuyuri, hakewa pemekateukieni,
mana mikahexuaweki 'uximayatsika,
kepemiti'atukaritiani meta tita pemituyemate
meta kepemitimaiwe piremaweni.

*Kaneuyeweka matsi mirakumaika keyuri
tirikariya*

11 Nepune'iwi yaxita 'ena kwiepa mem-
anautsawawe xeia mepikatehayu'iwa,
meta mepikatehayu'iwa xeia waikawa
memiyiwawe, metatsiere memitemaiwawe xeia
mepikate'utikwa'ani, meta memitemateta tumini
waikawa mepikahexeiya, meta memite'uyemate
mepikayutemamawie 'aixia metexeyarieti, matsi
pita yunaiti wahetsie kani'axeni tukarite 'aixia
'aneneti meta 'axa'aneneti.

12 Mipaita netinetimani xewiti 'atsipikatimate kepauka tukarieya maye'ani. Ketsite kememitekuwiniyariwa wipi 'axa'anemetsie meta wikixi winiyaritsie mekaniuyewiwireni, yaxeikiata teiteri mekaniwiniyarieka mipai memikateha'eriwanitsie katinaye'axeni wahetsie xeimieme.

13 Tawarita xeime nekanetimani kwiepa nekaratimaiyati mipai mitimaiwekaiki:

14 kiekari 'etsiyekame, teiteri yaki meyupaumeti memakuteitsie, xewiti ti'aitame tirikaiyeti mana kaneutahani 'e'iwake, waritana 'imumi 'ematayewa mekaniutawewieni memuwara'iwaki.

15 Miki kiekaritsie tewi mana kaniukateitini, tixaiti karexeiyati matsi xeikia pitimaiwekai, kemitimaiwekaiki kaniyiwekaitini kiekari mutawikweitsitaniki, xewiti tima pikaheye'eri miki tewi tixaiti mikarexeiyakaiki.

16 Ne mipai nepaine «matsi peuyewetse mirakumaika keyuri tirikaiyeti», tsepa kepauka mu'uxiwe'eriwa 'iya tewi mitimaiweki tixaiti karexeiyati, meta xika niukieya ka'u'enierieni.

17 Mitimaiwe niukieya matsi kaneuyeweka kayuwati mi'enierieka,
keyuri 'atsimemikatemate tiwa'aitiwame
'utahiwakaku.

18 Kaneuyeweka matsi waikawa mitimaiweniki,
keyuri tituaxame kuyaxa mieme.

Xeimeki 'axaxikapetiuyurieni
pekatinitixitiamiki 'aixia miti'ane.

10

Mitimaiweki 'ixatsiyari

- ¹ Xaipaṭsi memikwikwi'i 'axamekaniu'iatikani,
tita witsimitiu'ia katinanuyeitiwani.
Mipai katinimatsiikini xika 'etsiwa mikayikihiawe
pe'ayani,
pikayiwe muyutaxewire mitimaiweniki meta
'aixia mitixeyariekaki.
- ² Mitimaiwe katinikuwauneni tita 'aixia miti'ane
yu'iyaritsie,
matsi 'atsimikatitude katinikuwauneni
'axamiti'ane.
- ³ Meta huye'utia kemitimie 'atsimikatitude
waikawa katineiyehiaka miretimaniki, 'anari
yunaiti mipai mekatenetimaikuni kename
'atsikatitude.
- ⁴ Xika ti'aitame 'uyeha'ani 'ahepaṭsita,
pepika'iku'e'eiriwani ketitaki pemithiritiarie.
Petiukanewieti waikawa 'axapemitiuyuriki
kani'ayumiemetini.
- ⁵ Xewiti kanixuaweni tita 'axamiti'ane,
te'aitamete meheuyexiriweti kememiteyurie
hepai tiyuxexeyati:
- ⁶ 'atsimikatitude matsi waikawa
katinihiritiarieka timamariwawemeki,
peru memiyiwawe matsi 'etsiwa xeikia
mekatenihiritiarieka.
- ⁷ Nekaniwaxeiyanita wairiyarika
te'uximayatamete kawayutsixi wahetsie
mekaniuteni te'aitamete wahepai, teiterita
tewa'aitiwamete yu'ikama mekaniku'uwani
wairiyarika te'uximayatamete wahepai.
- ⁸ Putsu xika 'utawewieni,

muwa kaneukawemiki.
 Kemi'ane 'ixumeri hixiata 'akame mita'una,
 kuu kanikeimiki.

⁹ Xika tetexi pe'utitara,
 miki tetexi kametinikwinitiamiki.
 Kemi'ane kiye mawiteni,
 miki kiyexiki katiniyukwinitiaa.

¹⁰ Hatsa xika ka'ataxikaunini,
 meta xika ka'etamiani,
 matsi karima katinewitekemiki.
 Xika petimaimikini ketine'uximayaka 'aixia
 'anekameki,
 petimaiti meta 'aixia peti'a'iwiyati.

¹¹ Xika kuu tiuyukeni meri 'akuxi kwikariki kake-
 waiyarieweti,
 tixaiti pikara'iwa 'ikewaiyame.

¹² Kepauka mitimaiwe mitiwakuxaxatiwa, teiteri
 'aixia 'anemeki mekani'enieka,
 matsi kepaukata 'atsimikatitude mitikuxata,
 miki xeikia kaniwaka'unani,

¹³ Matiari mieme niukieya tixaiti pikatihiki,
 'imatiriekaka 'aixia pikatinini 'atsimikatitude.

¹⁴ Matsi xewiti pikayiwe yamitayiniki.

Xewiti pikatitude kemitiyini,
 meta 'arিকে kemiyini,
 xewiti pikayuwe yamitayiniki.

¹⁵ Mika'uka'iyari kemiti'uximaya yakı xeikia ka-
 tiniyu'uxitiaka,
 meta kiekari huyeyari 'utima pikahemarie.

16 Xia'ui kiekari ti'aitame mikatseiye mira'aitatsie,
meta tewa'aitiwamete
ximeri paiti mekanayatsariwani
memitekwaniki.

17 Matsi witsikatinikihawariwani kemi'ane
kiekaritsie ti'aitame 'aixia miti'uximaya,
meta te'aitamete kepauka memitekwa'a
mauyewetsetsie,
waikawa memititirikaxianiki
memitarikakiki pikatixai.

18 Miyu'iraxie kiiya heima mieme
kananuka'unikení,
mikatikumaíwa kiiya kaniuhayeweni.

19 Paa kwati kaniutanawemiki,
winu'ietí kaniyutemawiekamiki,
tuminita mitixitianiki kani'ayumiemetini.

20 Ti'aitame 'axapepikatikumamateni meta
'axapepikatu'eriyaní,
meta mixiku 'awie 'axapepikarahaweni,
wikixi muyuawitsie miemete mekaniyawaweni
niuki memenitikirieniki.
Mekaniu'anani mekaniyawaweni
memite'itaxatianiki.

11

1 Hata keneukahíwa 'apaa,
yapaímexia tukari 'anukayayu 'ana keta
pekanitaxeiyamiki.

2 Me'atahutame yatini me'atahaikame

ketiniwarumikwa tita pemirexeiya,
 'atsipemikatimateki tita 'uximatiarikayari
 'umiramie 'ena kwiepa.

³ Haiwitiri kepauka mayemanenitsie,
 kwiepa wiyeri kanikaxiriemiki.

Kiye xika tatsutia hataweni,
 yatini tayeta,
 hakewa meutaweni mana
 kaniyuhayewamiki.

⁴ Kemi'ane 'eka xeikia mitaxeiya, pika'uka'etsa,
 kemi'aneta haiwitiri xeikia mitaxeiya mikita
 pika'uka'itsana.

⁵ Mipai 'atsipemikatimateki 'eka kemireumie,
 meta kehepai memitekununuiwa tiri
 yumamama wahukatsie, yaxeikiata Kakaiyari
 'uximayatsikaya pepika'enie naime mitiutiwewi.

⁶ Ximeri paiti 'a'imari keneuka'etsa, taikaita
 'uxipiya pepikahexeiyani, matsi 'atsipepikatimate
 ke'aneti 'etsiyari 'aixia mitiyini, xika 'iya yatini 'iki,
 yamatsi naiti 'aixia 'aneneti pirayani.

⁷ Hekariya witsikani'aneni, 'aixiata kani'aneni
 tau hekariyayari xeyati 'amuyeikani.

⁸ Xika tewi matsi mixa wiyari 'a'uyeikani het-
 siena yutemawieti, matsi tukari tekeha'eriwani
 'uximatiarika mitixuaweretsie waikawa
 katiniyimiki, meta tita 'umiramie 'ana yaki xeikia
 pikarayani.

Matsi'utawewi kena'eriwani

⁹ Hiki kene'atemawieka mexi petemaiki,
 'a'iyari keneupitia miyutemawiekaki.

Kemiti'eriwa keneyeweyani meta 'ahixiteki
 kepemitiuyukahiwe'erie, matsi kena'eriwani
 Kakaiyari miki naimeki kamenita'iwawiyamiki.

¹⁰ 'Aiyaritsie haxia pepikapitiaka, 'ahetsie
 tita 'axamiti'ane ketinayeweyia, matsi temaiki
 yu'erietu meta temaikiyari yakixeikia kanihikitini.

12

¹ Kemi'ane matsi'utawewi kena'eriwani,
 hikiri pemitemaiki,
 mexineti tukari 'axami'ane ka'aye'awe,
 kepauka mipai pemitayini:
 «Pikanetsinakeri 'anemuyeikaniki miixa wi-
 yari»,

² matsi'utawewi kena'eriwani mexineti
 mehekiariwie
 tau meta hekiariya xuawe,
 metseri meta xurawetsixi mehekiariwie,
 meta mexi haiwitiri 'anuku'eke kepauka wiy-
 eri mititahayewatsie.

³ Tukari Kanaye'amiki kepauka kii hiwemete
 memitiyiyiaka marikaki,
 mekananakatutsirikuni yukukuyamete,
 'anari mekatenihayewakuni tiximete
 memikayumiireniki,
 'anarita mepikaneniereni, 'itupari 'etsi
 mayeyeutsie memaneniere.

⁴ Katinaunaririmemiki kitenie kaye 'utia mieme,
 'anari kananukanuaximemiki murina
 yuariyaya,
 wikixi yukwikari mekananukuhanikuni,
 matsi wakwikari pitikini puka'enierieka.

⁵ Marika Kanitixuawerimiki hirite 'amanu-
 titititsie,

'anarita huyeta kaniumariwemiki.
 'Arimenitira meta 'ana kanitixutuimiki,
 'utsikari mekani'axiakuni yumireti,
 mekanikakimikuni 'anari tixaiti tiyu-
 naki'erietu pika'ayani,
 tewi kaniyemieni kiekari 'emititeriwetsie,
 kaye'utia mekaniyexirietiwekuni, meyuhiw-
 erietu 'akaxari mexeiyati.

⁶ Kena'eriwani kemi'ane matsi'utawewi,
 mexi katatsaniwe pirata hiyameyari,
 meta mexi katatariwe huru xariyari,
 meta xari haa manakaxiriwetsie katitawaxiawe,
 tsikiririya katitarixiawawe putsuta mireti
 ka'ayeuwe.

⁷ 'Anari kwiepa tumuanari kanayeimiki,
 meripaiti mi'anekai hepai,
 'iyari kanakunuamiki Kakaiyari hetsia,
 miki mana meiyeni'aki.

⁸ Ti'ikitame mipai nekanaineni:
 'iki tukari tixaiti pikarexeiya,
 naiti 'axakatini'aneni.

Niuki 'imatarioka mieme

⁹ Matsi waikawa timaiweti, ti'ikitame teiteri
 katiniwarutaxatiani naime ketita miretima. Miki
 naime katineutixeyaxiani yumarima, mireme
 temaiwawemete kememite'u'ixatsita waxapa
 kanayeitiani.

¹⁰ Tsiepire hipame niukite kaniutaxeiya 'aixia
 'anuyitikaime, miki kaniti'utiani yumarima yuri
 maineki.

¹¹ Memitemaiwawe waniuki tiyutseweme
 hepai kani'aneneni. Kirapuxite 'aixia miretsunini

hepai mekatenikuxatani, xewiti xeikia
tixaxatame tiwakuxaxatiwakaku.

¹² Ne matsi miki hepaitsita nematsihaye'eritiwa
'eki neniwe nematsinaki'erie, waikawa xapate
xika'utiwewieni pikayinirinia, meta xika
pe'ititeriwa pekaniti'uximiki waikawa.

¹³ 'Imatarioka 'iki niuki naiti ka-
niu'enierieni. Kakaiyari matsi kenayemakaxeni,
yaketinekamieni 'aitsikayatsie, 'iki naiti tewi
hetsie kanimiemetini.

¹⁴ 'Uximayatsika matsi, 'axami'anene meta
'aixiami'ane meta 'awie ketemiteyurie Kakaiyari
naime kanita'iwaumiki.

**KAKAFYARI NIUKIEYA XAPAYARI
WIXARIKAKI**
**The Holy Bible in the in Huichol language of Mexico,
2020 edition**
**La Santa Biblia en lengua huichol de México, edición
2020**

copyright © 2020 Wycliffe Bible Translators, Inc.

Language: Huichol

Translation by: Wycliffe Bible Translators, Inc.

Huichol [hch], Mexico

Copyright Information

© 1988-2020, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Holy Bible

in Huichol

© 1988-2020, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-09-03

PDF generated using Haiola and XeLaTeX on 6 Sep 2025 from source files dated 4 Sep 2025

79690d81-fd4b-51b4-a3a6-712e0fddaca3